

Inicio di Academic Foundation Year na Universidat di Aruba

Riba diahuebs, 1 di September, e programa nobo di Universidat di Aruba cu yama Academic Foundation Year (AFY) a inicia. Un total di 65 estudiante a cuminsa cu e programa aki cual su enfoque principal ta pa surpasa e buraco cu tin entre enseñansa secundario y enseñansa profesional halto. E studentenan lo ricibi entrenamiento den abilidad di idioma, investigacion, pensa analiticamente, y nan lo ricibi un trayectoria di coaching desaroya specialmente pa e programa aki. Studentenan di AFY lo obtene oportunidad di participa den cursonan na e diferente facultadnan di Universidat como tambe den cursonan electivo cu ta ofreci den e programa di AFY mes. Esaki ta sumamente importante pa asina e studentenan por experencia e caracteristicanan y retonan di e disciplinanan academico.

Durante e apertura Minister di Enseñansa y Asuntonan di Famia, sra. Michelle Hooijboer-Winklaar, a dedica tempo pa bin saluda e studentenan di e programa nobo aki. E la subraya e hecho cu e AFY ta un tremendo oportunidad pa e studentenan di Aruba bira mihor prepara pa nan carrera academico. Tambe sra. Hooijboer-Winklaar a felisita e equipo di AFY y Universidat di Aruba pa e tremendo trabou di diseña e curriculo, ofrece e facilitadnan necesario, y crea un equipo nobo di educacion y coaching.

Pa por facilita e programa, Universidat di Aruba a expande su facilitadnan cu espacionan flexibel pa e equipo di AFY y tambe a expande cu 2 lokaal temporario pa asina acomoda e studentenan di e programa aki cu tur e facilitadnan necesario. E inauguracion oficial di e facilitadnan nobo a tuma lugar den presencia di e studentenan y personal di Universidat di Aruba na final di e evento introductorio di AFY.